



Broj: 02-50-6-16-10/23

Sarajevo, 4. 10. 2023.

ZAPISNIK

14-11-2023

10. sjednice Doma naroda

**Parlamentarne skupštine Bosne i Hercegovine,
održane 4. 10. 2023.**

Sjednica je počela u 11 sati.

Sjednicom je predsjedavao Nikola Špirić, predsjedavajući Doma naroda Parlamentarne skupštine BiH.

Sjednici je prisustvovalo 15 delegata.

Osim delegata, sjednici Doma naroda prisustvovali su predsjedavajuća Vijeća ministara BiH i članovi Vijeća ministara BiH.

Predsjedavajući je konstatirao da su, u skladu s članom 156. stav (1) Poslovnika, najave za postavljanje delegatskih pitanja u usmenoj formi dostavili sljedeći delegati:

- **Delegat Sredoje Nović** - uputio je pitanje Vijeću ministara BiH - Izvršnom obavještajnom odboru;
- **Delegat Ilija Cvitanović** uputio je pitanje ministru vanjskih poslova BiH Elmedinu Konakoviću;
- **Delegat Zlatko Miletić** uputio je pitanje u usmenoj formi Ministarstvu vanjskih poslova BiH i Predsjedništvu BiH.

Predsjedavajući je konstatirao da, s obzirom na to da je članom 155. stav (1) Poslovnika Doma naroda predviđeno da delegat može usmeno postavljati pitanja samo Vijeću ministara BiH, odgovor na delegatsko pitanje Zlatka Miletića upućeno Predsjedništvu BiH zatražen je u pisanoj formi.

- **Delegat Sredoje Nović** – pitanje za Vijeće ministara BiH - Izvršni obavještajni odbor glasi:

„Dana 6. 9. 2023. godine gospodin Konaković, ministar vanjskih poslova BiH, izjavio je novinarima u Sarajevu da je Obavještajna služba BiH zadokumentovala više od sto slučajeva zloupotrebe prisluškivanje političara, novinara i drugih lica bez naloga suda i da su Tužilaštvu BiH proslijeđeni dokazi koji govore o zloupotrebi bivšeg direktora ove agencije gospodina Osmana Mehmedagića. Postavljam pitanje – Da li je gospodin Konaković obavijestio o ovome Izvršni obavještajni odbor, da li je to razmatrano na Izvršnom obavještajnom odboru i da li su podaci dobiveni od Obavještajne službe zvanični ili privatni, jesu li podaci ustupljeni Tužilaštvu BiH?“

Predsjedavajuća Vijeća ministara BiH Borjana Krišto odgovorila je da je navedeno delegatsko pitanje Sredoja Novića potrebno delegirati na Izvršni obavještajni odbor jer danas u ovom trenutku u ime Izvršnog obavještajnog odbora nije u mogućnosti dati odgovor.

Delegat je zatražio dostavljanje odgovora u pisanoj formi.

- **Delegat Ilija Cvitanović** – pitanje za ministra vanjskih poslova BiH Elmedina Konakovića glasi:

„Poštovani ministre Konakoviću, cijeneći diplomatske napore koje Vi osobno i vaše ministarstvo činite na vraćanju povjerenja Bosni i Hercegovini u međunarodnim krugovima, ovim putem želim odati priznanje na zauzimanju i dosadašnjim ostvarenim aktivnostima u 2023. godini. Međutim, s obzirom na posljedice globalnih konflikata koje se osjećaju kod nas u BiH, a posebno na recentne događaje na Kosovu i našem širem okruženju gdje je očito da je određenim krugovima stalo da se dodatno destabilizira stanje i u samoj BiH, moje pitanje Vama odnosi se na rezultate vašeg ministarstva u sektoru ekonomske diplomacije.

Naime, u Ministarstvu vanjskih poslova unutar Sektora za bilateralne odnose djeluje i Odjel za ekonomsku diplomaciju. Glavni partneri Odjela za ekonomsku diplomaciju su Ministarstvo vanjske trgovine i ekonomskih odnosa BiH, dvije entitetske vlade i Vlada Brčko Distrikta BiH, te Agencija za unapređenje stranih investicija u BiH – FIPA i Vanjskotrgovinska komora BiH, te dvije gospodarske entitetske komore, a u Strategiji vanjske politike BiH za razdoblje 2018 – 2023. godina što, usput budi rečeno, znači da naznačeno razdoblje za provedbu Strategije

istječe za par mjeseci, navodi se između ostalog i sljedeće: 'Sigurnost i stabilnost BiH preduvjet je za jačanje ekonomske aktivnosti i poboljšanje životnog standarda, što ujedno vodi unapređivanju vanjskopolitičke pozicije i ugleda BiH u svijetu.' (Strategija stranica broj 5)

'Učinkovitost ekonomske diplomacije uvjetovana je internim reformskim procesima, ali od jednake važnosti je i vanjskopolitički aspekt koji podrazumijeva promidžbu postignutog napretka kroz javnu diplomaciju, pronalaženje adekvatnih tržišta za izvoz iz BiH, te privlačenje kvalitetnih stranih ulagača. Aktivnosti ekonomske diplomacije BiH podrazumijevaju sinkroniziranu koordinaciju djelovanja institucija BiH u čiju nadležnost spada izrada dokumenata kojima se promovira izvoz, privlačenje stranih investicija, razvojni potencijali postojećih sektora gospodarstva i industrije i Ministarstva vanjskih poslova BiH, te diplomatsko-konzularne mreže BiH.' (Strategija na stranici broj 9)

Molim Vas da se u pisanom obliku i detaljno obrazložen dostavi odgovor na sljedeće pitanje:

Što je Ministarstvo vanjskih poslova BiH u Vašem mandatu poduzelo i kakve je rezultate ostvarilo u polju ekonomske diplomacije s obzirom na jačanje ekonomske aktivnosti aktera u BiH koji će usljed unapređenja vanjskopolitičke pozicije i ugleda BiH u svijetu moći konkretno nastupiti na međunarodnim gospodarskim tržištima, primjerice:

- a. Kako uskladiti s vanjskim tržištima i uspostaviti standarde za određene proizvode i usluge koji će unapređenjem pozicije i ugleda BiH u svijetu rezultirati jačanjem izvoza, privlačenjem inozemnih investitora i razvojem domaćih potencijala u postojećim sektorima u BiH;
- b. Pronalaženje adekvatnih tržišta za izvoz iz BiH, primjer kako pomoći proizvođače primarne poljoprivredne proizvodnje poput npr. proizvođača jagodičastog voća u BiH? Na informaciju, da znate da u ovom trenutku desetine milijuna maraka ovoga voća stoji neizvezeno iz BiH zbog poremećaja na tržištu;
- c. Osposobljavanja diplomatskog i pomoćnog osoblja za učinkovito djelovanje sukladno načelima i parametrima ekonomske diplomacije i
- d. Analizu stanja i usklađivanje novih ciljeva vanjske politike BiH u kojoj bi ekonomska diplomacija trebala imati jednu od ključnih pozicija i na temelju kojih pokazatelja, odnosno kakvu ulogu će imati ekonomska diplomacija u vanjskoj politici BiH nakon 2023. godine?"

Delegat Ilija Cvitanović dobio je na sjednici usmeni odgovor na postavljeno pitanje od ministra vanjskih poslova BiH Elmedina Konakovića. Delegat je istakao da je zadovoljan dobivenim odgovorom, ali je zatražio da odgovor na delegatsko pitanje bude dostavljen i u pisanoj formi.

Delegat Zlatko Miletić uputio je pitanje u usmenoj formi Ministarstvu vanjskih poslova BiH i Predsjedništvu BiH.

Predsjedavajući je upoznao delegata Zlatka Miletića da je, s obzirom da je članom 155. stav (1) Poslovnika Doma naroda predviđeno da delegat može usmeno postavljati pitanja samo Vijeću ministara BiH, odgovor na pitanje upućeno Predsjedništvu BiH zatražen u pisanoj formi.

Delegat Zlatko Miletić - pitanje u usmenoj formi za Ministarstvo vanjskih poslova BiH glasi:

„Imajući u vidu činjenicu da se u medijima pojavila informacija o diplomatama državljanima Ruske Federacije, koji su zbog aktivnosti koje su u suprotnosti s Bečkom konvencijom o diplomatskim odnosima članom ili člankom 9. protjerani s teritorije Republike Hrvatske, odnosno Republike Sjeverne Makedonije, pronašli utočište u BiH na način da su akreditovani kao diplomate Ruske Federacije u Bosni i Hercegovini, postavljam pitanje – Kako je to moguće i tko je odgovoran za novonastalu situaciju?

Naime, radi se o osobama: Anton Sokolov, prvi sekretar koji je boravio u BiH u periodu od 15. 7. 2015. do 19. 4. 2021. i od 12. 1. 2023. do danas, i Ilija Serov, ataše, boravi u Bosni i Hercegovini od 25. 10. 2022. Oba su registrirani u Knjizi diplomatskog protokola Ministarstva vanjskih poslova iz maja/svibnja 2023. na stranicama 128. i 129. Postavlja se opravdano pitanje kako je moguće da se protjerane osobe, koje su proglašene personom non grata u nama prijateljskim zemljama, notifikuju kao diplomatsko osoblje u BiH i ko je odgovoran za to, tko vrši sigurnosne provjere za te osobe, kao i za sve ostalo diplomatsko osoblje koje je akreditovano u BiH i da li to itko radi uopšte? Ne, te na kraju postavljam pitanje – Da li će pomenutim osobama biti otkazano gostoprimstvo u Bosni i Hercegovini?

Nadalje, u ovom kontekstu postavljam ponovo izaslaničko pitanje od 22. 4. 2022. godine na koje mi nadležno Ministarstvo vanjskih poslova BiH niti Predsjedništvo BiH nikad nije odgovorilo, u vezi sa zahtjevom da Ministarstvo vanjskih poslova odgovori da li će protiv osoblja Diplomatsko-konzularnog predstavništva Ruske Federacije u BiH, u skladu sa zakonom i Bečkom konvencijom o diplomatskim odnosima, sačiniti obrazložen prijedlog za donošenje odluke u kojem će tražiti od Predsjedništva BiH da ambasadora/veleposlanika

njegovu ekscelenciju Igora Kalabuhova, te eventualno osoblje Diplomatsko-konzularnog predstavništva označi neprihvatljivim osobama, licima, odnosno personama non grata na osnovu predočenih činjenica od 21. 3. 2021, 17. 2, 15. 3, 18. 3, 4. 4. i 13. 4. 2022. te da li će Predsjedništvo BiH donijeti takvu odluku? Kao posljedicu navedenog neadekvatnog djelovanja institucija imamo daljnju neprimjerenu i nediplomatsku aktivnost pomenutih 19. 1, 24. 2, 7. 5. i 24. 8. 2023. godine koju također treba ozbiljno shvatiti i umjesto adekvatnog djelovanja institucija, mi pružamo utočište protjeranim diplomatama. Razlog za postavljeno pitanje, znači, nije osobnog karaktera, gospodine ministre, već je prije svega kontraobavještajna zaštita institucija BiH, te uspostava sistema nadležnosti i odgovornosti institucija i pojedinaca BiH u ovoj oblasti u posebnom, ali i u općem kontekstu. Pitanje, znači, postavljam nadležnom ministru vanjskih poslova gospodinu Konakoviću i Predsjedništvu BiH i tražim odgovor u usmenoj i pisanoj formi.“

Delegat Zlatko Miletić dobio je na sjednici usmeni odgovor na postavljeno pitanje od ministra vanjskih poslova BiH Elmedina Konakovića. Delegat je zatražio da odgovor na delegatsko pitanje bude dostavljen i u pisanoj formi.

Predsjedavajući je izvjestio da su delegati Zlatko Miletić i Džemal Smajić dobili odgovore u pisanoj formi na postavljena delegatska pitanja.

Delegat Zlatko Miletić dobio je odgovor u pisanoj formi na pitanje postavljeno na 8. sjednici Doma naroda.

Delegat Džemal Smajić dobio je odgovore u pisanoj formi na pitanja postavljena na 7, 8. i 9. sjednici Doma naroda.

Delegat Zlatko Miletić istakao je da je u formalno-pravnom smislu zadovoljan dobivenim odgovorom, a u etičkom i moralnom smislu nije zadovoljan.

Delegat Džemal Smajić istakao je da nije zadovoljan dobivenim odgovorima.

Predsjedavajući je potom konstatirao da je za današnju sjednicu predložen sljedeći izmijenjeni

DNEVNI RED

1. Usvajanje Zapisnika 9. sjednice Doma naroda Parlamentarne skupštine BiH;
2. Prijedlog zakona o izmjenama Zakona o osnovama sigurnosti saobraćaja na putevima u BiH (drugo čitanje), predlagač: Predstavnički dom, broj: 02-02-1-945/23 od 7. 7. 2023;
3. Prijedlog zakona o izmjeni Zakona o radu u institucijama Bosne i Hercegovine (drugo čitanje), predlagač: Predstavnički dom, broj: 02-02-1-701/23 od 26. 7. 2023;
4. Prijedlog zakona o izmjeni Zakona o porezu na dodatu vrijednost (prvo čitanje), predlagač: Predstavnički dom Parlamentarne skupštine BiH, broj: 01-02-1-1261/23 od 24. 8. 2023;
5. Izvještaj o stanju radijacijske i nuklearne sigurnosti za 2022. godinu, podnosilac: Državna regulatorna agencija za radijacijsku i nuklearnu sigurnost, broj: 01,02-50-18-1784/23 od 11. 8. 2023;
6. Delegatska inicijativa Kemala Ademovića, broj: 02-50-6-1841-2/23 od 25. 8. 2023;
7. Prijedlog odluke o osnivanju Ad hoc komisije Parlamentarne skupštine Bosne i Hercegovine za provođenje postupka imenovanja Vijeća Regulatorne agencije za komunikacije Bosne i Hercegovine, predlagač: Ministarstvo komunikacija i prometa BiH, broj: 01,02-34-1-312-1/23 od 4. 9. 2023;
8. Davanje saglasnosti za ratifikaciju Sporazuma o ekonomskoj saradnji između Bosne i Hercegovine i Republike Sjeverne Makedonije, broj: 01,02-21-1-1952/23 od 8. 9. 2023;
9. Davanje saglasnosti za ratifikaciju Ugovora o finansiranju između Bosne i Hercegovine, Republike Srpske i Evropske investicione banke (Projekat medicinskog kompleksa Banja Luka), Evropski fond za održivi razvoj – EFSD + Namjenski investicioni okvir 1 (FI No 91.071 – SERAPIS 2019-0319), broj: 01,02-21-1-2102/23 od 2. 10. 2023;
10. Davanje saglasnosti za ratifikaciju Sporazuma o investicionom grantu za podršku Projektu vodosnabdijevanja i sanitacije u Bosni i Hercegovini u okviru Instrumenta pretpristupne pomoći (IPA II) između Bosne i Hercegovine i Evropske investicione banke, broj: 01,02-21-1-2105/23 od 2. 10. 2023;
11. Davanje saglasnosti za ratifikaciju Sporazuma o priznavanju stručnih kvalifikacija doktora medicine, doktora dentalne medicine i arhitekata u kontekstu

Centralnoevropskog sporazuma o slobodnoj trgovini, broj: 01,02-21-1-2103/23 od 2. 10. 2023;

12. Davanje saglasnosti za ratifikaciju Sporazuma o priznavanju visokoškolskih kvalifikacija na Zapadnom Balkanu, broj: 01,02-21-1-2104/23 od 2. 10. 2023.

Predsjedavajući je otvorio raspravu o dnevnom redu sjednice.

U raspravi povodom dnevnog reda sjednice učestvovali su delegati: Šefik Džaferović, Želimir Nešković i Radovan Kovačević.

Delegat Želimir Nešković zatražio je da Kolegij uvrsti u dnevni red sjednice tačku: Zahtjev delegata Želimira Neškovića za razmatranje Prijedloga zakona o Ustavnom sudu Bosne i Hercegovine po hitnom postupku, u skladu s članom 124. Poslovnika Doma naroda.

Predsjedavajući je upoznao delegata Želimira Neškovića da, ako delegat želi da navedena tačka bude tačka dnevnog reda sjednice, treba definirati svoj prijedlog za dopunu dnevnog reda navedenom tačkom te se Dom treba izjasniti o tome.

Ad. 1. Usvajanje Zapisnika 9. sjednice Doma naroda Parlamentarne skupštine BiH

Predsjedavajući Doma naroda otvorio je raspravu o ovoj tački dnevnog reda.

U raspravi je učestvovao delegat Želimir Nešković.

Dom naroda je (prisutno 15 delegata), s 14 glasova „za“ i jednim glasom „protiv“ (iz Federacije BiH deset „za“, iz Republike Srpske četiri „za“ i jedan „protiv“), usvojio Zapisnik 9. sjednice Doma naroda Parlamentarne skupštine BiH.

Ad. 2. Prijedlog zakona o izmjenama Zakona o osnovama sigurnosti saobraćaja na putevima u Bosni i Hercegovini (drugo čitanje), predlagač: Predstavnički dom, broj: 02-02-1-945/23 od 7. 7. 2023.

Predsjedavajući Doma naroda otvorio je raspravu o ovoj tački dnevnog reda.

U raspravi je učestvovao delegat Zlatko Miletić.

Od prisutnih 15 delegata, 11 glasova je bilo „za“ i četiri glasa „protiv“ (iz Federacije BiH deset „za“, iz Republike Srpske jedan „za“ i četiri „protiv“).

Predsjedavajući je konstatirao da Prijedlog zakona o izmjenama Zakona o osnovama sigurnosti saobraćaja na putevima u Bosni i Hercegovini nije dobio potrebnu entitetsku većinu, te će biti obavljeno naknadno usaglašavanje u Kolegiju kao komisiji.

Ad. 3. Prijedlog zakona o izmjeni Zakona o radu u institucijama Bosne i Hercegovine (drugo čitanje), predlagatelj: Predstavnički dom, broj: 02-02-1-701/23 od 26. 7. 2023.

Predsjedavajući Doma naroda otvorio je raspravu o ovoj tački dnevnog reda.

U raspravi je učestvovao delegat Zlatko Miletić.

Od prisutnih 15 delegata, 11 glasova bilo je „za“ i četiri glasa „protiv“ (iz Federacije BiH deset „za“, iz Republike Srpske jedan „za“ i četiri „protiv“).

Predsjedavajući je konstatirao da Prijedlog zakona o izmjeni Zakona o radu u institucijama Bosne i Hercegovine nije dobio potrebnu entitetsku većinu, te će biti obavljeno usaglašavanje u Kolegiju kao komisiji.

Ad. 4. Prijedlog zakona o izmjeni Zakona o porezu na dodatu vrijednost (prvo čitanje), predlagatelj: Predstavnički dom Parlamentarne skupštine BiH, broj: 01-02-1-1261/23 od 24. 8. 2023.

Predsjedavajući Doma naroda otvorio je raspravu o ovoj tački dnevnog reda.

U raspravi su učestvovali: Želimir Nešković, Zlatko Miletić, Džemal Smajić i Radovan Kovačević.

Od prisutnih 15 delegata, 11 glasova bilo je „za“ i četiri glasa „protiv“ (iz Federacije BiH deset „za“, iz Republike Srpske jedan „za“ i četiri „protiv“).

Predsjedavajući je konstatirao da Prijedlog zakona o izmjeni Zakona o porezu na dodatu vrijednost nije dobio potrebnu entitetsku većinu, te će biti obavljeno usaglašavanje u Kolegiju kao komisiji.

Ad. 5. Izvještaj o stanju radijacijske i nuklearne sigurnosti za 2022. godinu, podnosilac: Državna regulatorna agencija za radijacijsku i nuklearnu sigurnost, broj: 01,02-50-18-1784/23 od 11. 8. 2023.

Predsjedavajući Doma naroda otvorio je raspravu o ovoj tački dnevnog reda.

Nije bilo delegata prijavljenih za raspravu.

Dom naroda (prisutno 14 delegata), s 13 glasova „za“ i jednim glasom „suzdržan“ (iz Federacije BiH devet „za“, iz Republike Srpske četiri „za“ i jedan „suzdržan“), usvojio je Izvještaj o stanju radijacijske i nuklearne sigurnosti za 2022. godinu.

Ad. 6. Delegatska inicijativa Kemala Ademovića, broj: 02-50-6-1841-2/23 od 25. 8. 2023.

Predsjedavajući Doma naroda otvorio je raspravu o ovoj tački dnevnog reda.

U raspravi su učestvovali: Kemal Ademović, Zlatko Miletić, Dragan Čović, Džemal Smajić i Marina Pendeš.

Dom naroda (prisutno 14 delegata), sa šest glasova „za“, sedam „protiv“ i jednim glasom „suzdržan“ (iz Federacije BiH šest „za“ i tri „protiv“, iz Republike Srpske četiri „protiv“ i jedan „suzdržan“), nije usvojio delegatsku inicijativu Kemala Ademovića.

Ad. 7. Prijedlog odluke o osnivanju Ad hoc komisije Parlamentarne skupštine Bosne i Hercegovine za provođenje postupka imenovanja Vijeća Regulatorne agencije za komunikacije Bosne i Hercegovine, predlagač: Ministarstvo komunikacija i prometa BiH, broj: 01,02-34-1-312-1/23 od 4. 9. 2023.

Predsjedavajući Doma naroda otvorio je raspravu o ovoj tački dnevnog reda.

Nije bilo delegata prijavljenih za raspravu.

Sedam glasova bilo je „za“, pet glasova „protiv“ i dva glasa „suzdržan“ (iz Federacije BiH tri „za“, četiri „protiv“ i dva „suzdržana“, iz Republike Srpske četiri „za“ i jedan „protiv“).

Predsjedavajući je konstatirao da Prijedlog odluke o osnivanju Ad hoc komisije Parlamentarne skupštine Bosne i Hercegovine za provođenje postupka imenovanja Vijeća Regulatorne agencije za komunikacije Bosne i Hercegovine nije dobio potrebnu entitetsku većinu, te će biti obavljeno usaglašavanje u Kolegiju kao komisiji.

Predsjedavajući je predložio objedinjavanje rasprave i izjašnjavanja o tačkama od 8. do 12, uključujući i tačku 12. dnevnog reda.

Dom naroda (prisutno 14 delegata), s 13 glasova „za“ i jednim glasom „suzdržan“ (iz Federacije BiH osam „za“ i jedan „suzdržan“, iz Republike Srpske pet „za“), prihvatio je prijedlog za objedinjavanje rasprave i izjašnjavanja o tačkama od 8. do 12, uključujući i tačku 12. dnevnog reda.

Predsjedavajući Doma naroda otvorio je raspravu o ovoj tački dnevnog reda.

U raspravi je učestvovao delegat Zlatko Miletić.

Dom naroda je (prisutno 14 delegata) jednoglasno (iz Federacije BiH devet „za“, iz Republike Srpske pet „za“) dao saglasnost za ratifikaciju:

- Sporazuma o ekonomskoj saradnji između Bosne i Hercegovine i Republike Sjeverne Makedonije, broj: 01,02-21-1-1952/23 od 8. 9. 2023;
- Ugovora o finansiranju između Bosne i Hercegovine, Republike Srpske i Evropske investicione banke (Projekat medicinskog kompleksa Banja Luka), Evropski fond za održivi razvoj – EFSD + Namjenski investicioni okvir 1 (FI No 91.071 – SERAPIS 2019-0319), broj: 01,02-21-1-2102/23 od 2. 10. 2023;
- Sporazuma o investicionom grantu za podršku Projektu vodosnabdijevanja i sanitacije u Bosni i Hercegovini u okviru Instrumenta pretpristupne pomoći (IPA II) između Bosne i Hercegovine i Evropske investicione banke, broj: 01,02-21-1-2105/23 od 2. 10. 2023;
- Sporazuma o priznavanju stručnih kvalifikacija doktora medicine, doktora dentalne medicine i arhitekata u kontekstu Centralnoevropskog sporazuma o slobodnoj trgovini, broj: 01,02-21-1-2103/23 od 2. 10. 2023;
- Sporazuma o priznavanju visokoškolskih kvalifikacija na Zapadnom Balkanu, broj: 01,02-21-1-2104/23 od 2. 10. 2023.

Sjednica je završena u 13.54 sati.

Sastavni dio Zapisnika je neautorizirani transkript 10. sjednice Doma naroda Parlamentarne skupštine BiH.

SEKRETARKA

DOMA NARODA

Gordana Živković

PREDSJEDAVAJUĆI

DOMA NARODA

Dr. Nikola Špirić